

Ободбой ҚИЛИЧБОЕВ,
Алишер Навоий номидаги Ўзбекистон
Миллий кутубхонасининг бош мутахассиси

КУТУБХОНАЧИЛАРНИНГ АНЪАНАВИЙ ХАЛҚАРО АНЖУМАНИ

Ахборот-кутубхона фаолияти бўйича ҳар йили мунтазам анъанавий “INFOLIB” Миллий ахборот-кутубхона ҳафталиги ҳамда “Central Asia – Фан, таълим, маданият ва бизнесда интернет ва ахборот-кутубхона ресурслари” мавзuida Халқаро конференция ўтказиб келинмоқда.



Ушбу йирик тадбирларда республикамиздаги ахборот-кутубхона муассасаларининг бугунги кундаги ҳолати, соҳага оид қабул қилинган норматив-ҳуқуқий ҳужжатларнинг ижроси, тажрибалари, муаммолари таҳлил қилиниб, истикболдаги режалари белгилаб олинади ва ҳамкорликда ишлаш жараёни давом эттириб борилади.

Жорий йилнинг 18 – 20 апрель кунлари Сурхондарё вилоятининг Термиз шаҳрида “Central Asia – 2018: Фан, таълим, маданият ва бизнесда интернет ва ахборот-кутубхона ресурслари” мавзuida XII Халқаро конференция бўлиб ўтди.

Ушбу халқаро конференция дастлаб 1999 йил 11 – 15 октябрь кунлари Самарқанд шаҳрида бўлиб ўтган. У 1999 йилдан 2010 йилгача икки йилда бир маротаба ўтказилган бўлса, 2013 йилдан бошлаб ҳар йили ўтказиб келинмоқда. Халқаро конференцияни вилоятларда ўтказишга алоҳида эътибор берилмоқда.

Конференциянинг мақсади – фан, таълим, маданият ва бизнес соҳаларида электрон ахборот ресурсларини ривожлантириш ва қўллашда ахборот-кутубхона муассасалари, ўқув юртлари, архивлар, музейлар ва бошқа ташкилотлар фаолиятини самарали ҳамкорликда кенгайтиришдан иборат.

Конференцияда МДХ ва хорижий давлатларнинг Миллий кутубхоналаридан мутахассислар, ахборот-ресурс марказлари, ахборот-кутубхона марказлари ва кутубхоналар, нашриётлар, архивлар раҳбар ва мутахассислари, таълим муассасалари олимлари, АКТ мутахассислари, жамоат арбоблари, вазирлик ва идоралардан жами 330 дан ортиқ вакиллар иштирок этишди.

Алишер Навоий номидаги Ўзбекистон Миллий кутубхонаси ташкил этган мазкур конференция Ўзбекистон матбуот ва ахборот агентлиги, Маданият вазирлиги, Олий ва ўрта махсус таълим, Халқ таълими, Соғлиқни сақлаш, Ахборот технологиялари ва коммуникацияларини ривожлантириш вазирликлари, Ўзбекистон Республикаси Фанлар академияси, Ўрта махсус касб-хунар таълими маркази, “Ўзархив” агентлиги, Ўзбекистон касаба уюшмалари Федерацияси Кенгаши ва Сурхондарё вилоят ҳокимлиги ҳамкорлигида ўтказилди.

2018 йил 17 апрелда Адиб Собир Термизий номидаги Сурхондарё вилоят ахборот-кутубхона марказида Халқаро конференцияга бағишланган матбуот анжумани бўлиб ўтди. Унда оммавий ахборот воситалари ходимлари ва ахборот-кутубхона муассасаларининг мутахассислари ҳамда вазирлик, идоралардан вакиллари иштирок этишди.

Халқаро конференция 18 апрель куни Термиз шаҳридаги Ёшлар марказида тантанали равишда очилди. Конференциянинг тантанали очилиш ма-

росимида Сурхондарё вилояти ҳокими Э.Турдимов соҳада эришилаётган ютуқлар билан биргаликда аҳолининг китобхонлик маданиятини ошириш, ахборот-кутубхона муассасаларининг ишини янада яхшилаш, бадий адабиётлар сонини кўпайтириш ва сифатини яхшилаш, китоб маҳсулотларини нашр этиш ва тарқатиш тизимини ривожлантиришдаги муаммоларни ўзаро ҳамкорлик билан бартараф этишда ушбу конференциянинг аҳамиятини таъкидлади ва қатнашчиларни қутлади.

Ўзбекистон матбуот ва ахборот агентлиги Бош директорининг биринчи ўринбосари С.Шукуров анжуманнинг айни кунларда долзарб эканига урғу бериб, унинг ижобий натижаларига умид билдирирар экан, иштирокчиларни маърифат ва зиё байрами билан қутлади.

Ўзбекистон Миллий кутубхонаси директори А.Абдуазизов конференциянинг мақсади, ахборот-кутубхона соҳаси мутахассислари фаолиятидаги аҳамияти билан биргаликда Ўзбекистон Республикаси Президентининг 2017 йил 13 сентябрдаги “Китоб маҳсулотларини нашр этиш ва тарқатиш тизимини ривожлантириш, китоб мутолааси ва китобхонлик маданиятини ошириш ҳамда тарғибот қилиш бўйича комплекс чора-тадбирлар дастури тўғрисида”ги ПҚ-3271-сон қарори ва унда белгиланган вазифалар ҳақида тўхталди.

Конференциянинг ялпи мажлисида Корея миллий кутубхонаси рақамли кутубхона бўлими директор ўринбосари Инсук Ким, Гордон ҳукумат Коллежи, Равалпинди (Покистон) профессори Наушахи Ариф, Муҳаммад ал-Хоразмий номидаги Тошкент ахборот-технологиялари университетининг профессори, техника фанлари доктори Марат Раҳматуллаев, Жанубий Кореянинг LG CNS компанияси “Миллий умумтаълим электрон кутубхона” лойиҳаси менежери Томас Ким, Россия фанлар академияси Сибирь бўлимининг давлат оммавий илмий-техникавий кутубхонаси илмий қотиби Оксана Макеева, Эрон миллий кутубхонаси ва Архиви директор ўринбосари Гхотамреза Амирхани, Б.Н.Ельцин номидаги Президент кутубхонаси Федерал давлат бюджет муассасаси (ФДБМ) лингвистик ва дастурий таъминотни ривожлантириш бўлими раҳбари Юлия Селиванова ва бош методисти Любовь Завьялова, Тожикистон миллий кутубхонаси директори ўринбосари Гадобек Маҳмудов, Назарбаев университети кутубхонаси директор ўринбосари Петр Лапо ялпи мажлисда маърузалар билан иштирок этдилар.

Халқаро конференция доирасида Ёшлар марказининг фойесида мамлакатимиздаги матбаа корхоналарининг маҳсулотлари кўرғазмаси ташкил этилди. Унда республикамиз нашриётлари томонидан чоп этилган китоблар, альбомлар, журналлар ва бошқа матбаа маҳсулотлари намойиш этилди.

19 апрель куни Термиз давлат университетининг ахборот-ресурс маркази биносида Халқаро конференция ўз ишини давом эттирди.

Конференция давомида қуйидаги 4 асосий шўъбаларда маърузалар тинглиниб, муҳокамалар қилинди.

Худудларда ахборот-кутубхона соҳасини ривожлантиришда янги тенденциялар мавзуга бағишланган 1-шўъба йиғилишини Ўзбекистон Миллий кутубхонаси директор ўринбосари У.Тешабаева олиб борди. Унда ахборотга эга бўлиш, Ўзбекистон ахборот-кутубхона муассасалари фаолиятига халқаро тажрибани жорий қилиш, стандартлаштириш, ахборот-кутубхона фондларини қайта баҳолаш, экокутубхона, китоб мутолааси ва унинг аҳамияти, болаларни зарарли ахборотдан ҳимоя қилиш, депозит фондларни шакллантириш, бугунги куннинг китоблари ва китобхонлари ҳамда замонавий ўқув заллари каби масалалар, китоб мутолааси ва китоб ўқиш маданияти самарадорлигини ошириш ва ахборот-кутубхона фаолиятида китобхонлик маданиятини шакллантириш омиллари муҳокама қилинди.

2-шўъба йиғилиши “Фан ва таълим ривожидида ахборот-кутубхона муассасаларининг роли” мавзусига бағишланди, уни Самарқанд давлат чет тиллари институти профессори М.Лутфуллаев олиб борди. Унда ахборот-кутубхона муассасаларининг имижини такомиллаштиришда ижтимоий медианинг роли, Покистонда чоп этилган Марказий Осиё тарихи ва маданияти тўғрисида замонавий тадқиқот ишлари, жамиятда замонавий ахборот-кутубхона муасса-



саларининг ўрни ва аҳамияти, ёшлар ўртасида китобхонлик маданиятини шакллантиришда ахборот-ресурс марказларининг роли, мутолаа воситасида тарбия, ахборот-кутубхона менежментини раҳбарнинг касбий маданияти, мактаб кутубхонасида ўқиш ва китобхонлик маданияти ривожланишида айрим тенденция ва вазифалар, ахборот маданиятининг замонавий талқини ва уни ёшларда шакллантириш масалалари, фан ва таълимни модернизациялаш шароитида ягона ахборот-таълим маконини яратишнинг аҳамияти тўғрисида маърузалар тингланди.



Ахборот-кутубхона муассасаларининг нашриётлар, архивлар ва музейлар билан ўзаро ҳамкорлиги масалалари: ҳукумат топшириқлари ижроси мавзусига бағишланган 3-шўба йиғилишида Бар-Илан университети (Исроил) аспиранти, Тошкент шаҳар архив иши ҳудудий бошқармаси раҳбари, Ўзбекистон Республикаси Вазирлар Маҳкамаси ҳузуридаги “Ўзархив” агентлиги, Ўзбекистон Республикаси Марказий давлат архиви, Ўзбекистон Республикаси Кинофотоҳужжатлар Марказий давлат архиви, Термиз археология музейи, Хива шаҳридаги Ичан-Қалъа давлат музей кўрикхонаси мутахассислари ўз маърузалари билан иштирок этдилар. 3-шўба йиғилишини Ўзбекистон Республикаси Вазирлар Маҳкамаси ҳузуридаги “Ўзархив” агентлиги бўлим бошлиғи О.Ҳасанова олиб борди.

Технологиялар ва инновацияларни жорий қилиш – аҳолига ахборот-кутубхона хизмати сифатини оширишдаги муҳим масалаларга бағишланган 4-шўба йиғилишини Республика марказий кўзи ожизлар кутубхонаси директор ўринбосари Г.Бердимбетова олиб борди. Мазкур шўба иштирокчиларига кутубхоналар фаолиятида инновацион ғоя ва технологиялар, “Амир Темури” мультимедия дастури, китоб ва ижтимоий тармоқлар, ахборот-кутубхона тизимининг статистика генератори, “Библиометрик” маълумотларнинг Ўзбекистон тараққиётини ривожлантиришдаги ўрни, ягона корпоратив автоматлаштирилган ахборот кутубхона тизимини яратиш, инновацияларни татбиқ этиш, замонавий электрон кутубхоналар, библиотерапия масалалари муҳокама қилинди.

Бундан ташқари конференция доирасида “Жаҳон ахборот ресурслари: инновацион фаолиятда янгича ёндашув” мавзусида маҳорат дарслари “Аналитик тизимлар ва маълумотлар базалари билан ишлаш

асослари” ва “EBSCO электрон маълумотлар базаларидан фойдаланиш асослари” мавзуларида тренинглари бўлиб ўтди.

Конференциянинг ялпи ва шўба йиғилишларида 64 та маъруза тингланиб, муҳокама қилинди.

“Central Asia – 2018” XII Халқаро конференциясининг асосий йўналишлари “Ахборот-кутубхона фаолияти тўғрисида”ги Ўзбекистон Республикаси Қонуни, Ўзбекистон Республикаси Президентининг 2017 йил 13 сентябрда ПҚ-3271-сон қарори “Китоб маҳсулотларини нашр этиш ва тарқатиш тизимини ривожлантириш, китоб мутолааси ва китобхонлик маданиятини ошириш ҳамда тарғибот қилиш бўйича комплекс чора-тадбирлар дастури тўғрисида”ги қарори, Ўзбекистон Республикаси Президентининг 2018 йил 19 февралдаги ПФ-5349-сонли “Ахборот технологиялари ва коммуникациялари соҳасини янада такомиллаштириш чора-тадбирлари тўғрисида”ги фармонида белгиланган вазифаларнинг амалга оширилиши билан боғлиқ бўлди.

Конференцияда фан, таълим, маданият ва иқтисодиёт ривожидида ахборот-кутубхона муассасалари ролининг сезиларли ўсиши билан бир қаторда ахборот-кутубхона муассасалари мутахассислари ва фойдаланувчилари, айниқса, ёшларнинг ахборот маданияти ва китобхонлик маданиятини оширишда шароитлар яратиш масаласи тобора долзарб бўлиб бораётганлиги қайд этилди.

Конференциянинг охириги куни 20 апрелда иштирокчилар учун Термиз шаҳрининг диққатга сазавор жойлари, муқаддас қадамжолар ва зиёратгоҳларга эскурсиялар ташкил қилиш, китобхонлар билан эркин учрашувлар ўтказиш, шунингдек, мамлакатимизда ахборот-кутубхона соҳасини ривожлантиришга оид таклиф ва тавсиялар қабул қилиш билан анжуман ўз ишини якунлади.